

周易程朱傳義折衷

周易程傳卷之六

欽定四庫全書

周易程朱傳義折衷卷十五

元 趙采 撰

䷲ 震下
艮上

程子曰序卦物畜然後可養故受之以頤夫物既畜聚則必有以養之无養則不能存息頤所以次大畜也卦上艮下震上下二陽爻中含四陰上止而下動外實而中虛人頤頤之象也頤養也人口所以飲食

養人之身故為頤聖人設卦推養之義大至於天地
養育萬物聖人養賢以及萬民與人之養生養形養
德養人皆頤養之道也動息節宣以養生也飲食衣
服以養形也威儀行義以養德也推已及物以養人也
頤貞吉觀頤自求口實彖曰頤貞吉養正則吉也觀頤
觀其所養也自求口實觀其自養也天地養萬物聖人
養賢以及萬民頤之時大矣哉

程子曰頤之道以正則吉也人之養身養德養人養

于人皆以正道則吉也天地造化育養萬物各得其
宜者亦正而已矣觀頤自求口實觀人之所頤與其
自求口實之道則善惡吉凶可見矣貞吉所養者正
則吉也所養謂所養之人與養之之道自求口實謂
其自求養身之道皆以正則吉也聖人極言頤之道
而贊其大天地之道則養育萬物養育萬物之道正而
已矣聖人作養賢才與之共天位使之食天祿俾施
澤於天下養賢以及萬民也養賢所以養萬民也夫

天地之中品物之衆非養則不生聖人裁成天地之
道輔相天地之宜以養天下至於鳥獸草木皆有養
之之政其道配天地故夫子推頤之道贊天地與聖
人之功曰頤之時大矣哉

愚曰頤口車之名聖人見震艮之合外實中虛有
口象下動上止有嚼象故名之曰頤頤之用養也
養以正則吉養不正則凶故曰頤貞吉卦自臨四
變為頤頤是大畫底離離為目觀也觀人之所養

必自求口實處覘之口實不過言語飲食言語飲食得其正則足以知所養之正若不正則足以知其所養之邪口實即觀頤之自也彖辭言觀頤觀其所養自求口實觀其自養兩句只一意言欲觀其所養觀其自求口實養者何如至於象辭聖人又專以慎言語節飲食為言可見觀頤只在觀口實上分曉故觀辭寡可知為吉人觀辭多可知為躁人觀飯糗茹草若將終身可知為舜觀陋巷簞瓢

其樂不改可知為顏觀不食周粟可知為夷齊觀
曲肱飲水可知為孔子則言語飲食豈非觀頤之
自乎彖又於震艮之象推之曰天地養萬物聖人
養賢以及萬民乾天也坤地也乾交坤之初為震
交坤之上為艮陰陽相交養萬物也上九尚賢在
五位之上坤衆為民聖人養賢以及萬民也養萬
物本乎陰陽陰陽正則萬物遂矣養萬民本乎養
賢正人在上萬民遂矣養物養民以時為大故曰

頤之時大矣哉

象曰山下有雷頤君子以慎言語節飲食

程子曰以二體言之山下有雷雷震于山下山之生物皆動其根荦發其萌芽為養之象以上下之義言之艮止而震動上止下動頤頤之象也以卦形言之上下二陽中含四陰外實中虛頤口之象口所以養身也故君子觀其象以養其身慎言語以養其德節飲食以養其體不唯就口取養義事之至近而所繫

至大者莫過于言語飲食也在身為言語于天下則
凡命令政教出于身者皆是慎之則必當而无失在
身為飲食于天下則凡貨資財用養于人者皆是節
之則適宜而无傷推養身之道則養德養天下莫不
然也

愚曰震為決躁艮在上而止之慎言語也頤中无
物節飲食也言語不慎則招禍飲食不節則生疾
皆非所養之道故觀頤觀于此而已

初九舍爾靈龜觀我朵頤凶象曰觀我朵頤亦不足貴也

程子曰蒙之初六蒙者也爻乃主發蒙而言頤之初九亦假外而言爾謂初也舍爾之靈龜乃觀我而朵頤我對爾而設初之所以朵頤者四也然非四謂之也假設之辭爾九陽體剛明其才智足以養正者也龜能咽息不食靈龜喻其明智而可以不求養于外也才雖如是然以陽位居動體而在頤之時求頤人所

欲也上應于四不能自守志在上行說所欲而朶頤者也心既動則其自失必矣迷欲而失己以陽而從陰則何所不至是以凶也朶頤為朶動其頤頤人見食而欲之則動頤垂涎故以為象九動體朶頤謂其說陰而志動既為欲所動則雖有剛健明智之才終必自失故其才亦不足貴也人之貴乎剛者為其能立而不屈于欲也貴乎明者為其能照而不失其正也既惑所欲而失其正何剛明之有為可賤也

愚曰頤自明夷之離三變成頤又頤是大畫底離
離為龜故初九有龜之象伏于坤上之下龜蟄時
也龜所以靈者蟄則咽息不動无求于外君子在
下所養以正靈龜之類也今初九靈龜自可不食
乃舍而上應六四是舍爾所以為靈龜者觀我而
朶其頤也初在動體之下頤而動朶頤也爾言初
九我言六四舍爾觀我忘已從欲動而不正凶之
道也夫貴于陽者為其特立不屈於欲今躁妄徒

鋪无耻自辱不足貴矣何者飲食之人人皆賤之
六二顛頤拂經于丘頤征凶象曰六二征凶行失類也
程子曰女不能自處必從男陰不能獨立必從陽二
陰柔不能自養待養於人者也天子養天下諸侯養
一國臣食君上之祿民賴司牧之養皆以上養下理
之正也二既不能自養必求養于剛陽若反下求于
初則為顛倒故云顛頤顛則拂違經常不可行也若求
養于丘則徃必有凶丘在外而高之物謂上九也卦止

二陽既不可顛順于初若求順于上九往則凶在順之時相應則相養者也上非其應而往求養非道妄動是以凶也顛順則拂經不獲其養爾妄求于上往則得凶也今有人才不足以自養見在上者勢力足以養人非其族類妄往求之取辱得凶必矣六二中正在他卦多吉而凶何也曰時然也陰柔既不足以自養初上二爻皆非其與故往求則悖理而得凶也征而從上則凶者非其類故也往求而失其類得凶

宜矣行往也

朱子曰求養於初則顛倒而違于常理求養于上則往而得凶丘土之高者上之象也

愚曰初上二陽為一卦之主初以失已而凶上以由順而吉理之自然也至二與四三與五則或顛或拂于順之道有所不順蓋遠近相取勢有所就耳亦視其所向之得失而吉凶可知矣就養于下曰顛違其常理曰拂以上養下此常理也常理謂

之經二宜求養于五今顛倒而求養于初可謂拂
其上養下之經常矣上六之艮為山山半為丘五
也以五養二謂之丘順于往也越也今二既求養
于初而倒施矣又欲越丘順而上征以從上九上
下求養皆失之故曰凶象曰行失類也以五乃二
之類上非二類也

六三拂順貞凶十年勿用无攸利象曰十年勿用道大
悖也